

Union Sindical di Aruba, a keda forma



ALGUN dia atras, un reunion a keda convoca cu tur sindicato, pa wak con por yega na un Union Sindical. Siman pasa, nan a dicidi riba e nomber, cu a bira: Union Sindical di Aruba.

Como vocero a actua Hubert Dirksz, Presidente di FTA, kende a duna di conoce cu siman pasa a convoca atrobe un reunion cu tur sindicato, unda 12 a duna acto di presencia.

Algún cu tabata den reunion anterior, no por tabata presente e biaha aki, pero na nan lugar, a uni 3 sindicato mas.

Tin 2 sindicato cu e Union ta pendiente di un contesta, kendenan lo tin algun problema interno pa atende.

Segun Hubert Dirksz mirando e atencencia, e ta un indicacion, cu tur sindicato ta dispuesto pa traha cu otro den un union, ya cu tin varios preocupacion pa cu e clase trahador, cu mester wordo atendi.

E union aki a nace, na momento cu FTA a busca e union aki pa para tras di e lucha pa evita cu Gobierno, aboli e articulo di 1613X, pero manera ta conoci Gobierno, a dicidi cu e articulo aki lo no wordo elimina.

Lo contrario, Minister di Trabao, Paul Croes a dicidi di convoca un reunion cu tur sindicato, pa sigui cu dialogo, unda lo evalua unda lo por haya otro na bienestar di e clase trahador.

E sindicatonan a dicidi riba un nomber, cu a bira Union Sindical di Aruba. Ta intencion p'e siman aki convoca un conferencia di prensa, pa duna mas informacion di nan meta y kico ta nan posicion.

A discuti caba e reglanan cu cada sindicato lo atene nan mes na dje, y lo para firme pa sali na defensa di e clase trahador.

Cada sindicato tin nan problema, pa cu nan miembronan, pero como Union nan ta para firme, y lo yuda e sindicatonan cu nan problema pa cu nan miembronan.